

# Weh Wi Ga Fi Seh

Vairos di eez dong,  
bot kip op yu helt.

## Maach 21 di Kohn Rong: Kip Haat

Maach 21 wahn mek chree monts sins Kriol kolcha laydi Mis Myrna gaahn bak da Faada Gaad. Di Nashanal Kriol Kongsal, langsaid di Bileez Hischri Asoasiyayshan, kantinyu di aana di layt Myrna Manzanares evri mont aanlain pahn di 21, di day Mis Myrna mi wayk op ded. Maybi yoo waahn shyaa sohnting yoo mi noa bowt Mis Myrna Kriol werk er ada werk. If yu waahn jain een er jos fi lisn, yu ku eemayl [nkcbelize@gmail.com](mailto:nkcbelize@gmail.com) fi moa infamayshan ahn di ZOOM Meeting link an ID. Wan ting Mis Myrna mi laik du da rait, ahn shee doz inkorij mi fi rait tu. Tudeh, mee di shyaa wahn lee poayem weh mee, Silvaana, mi rait wen Ah mi deh eena kwaranteen. Ah waahn shyaa it sayk a soh moch ting di hapm: vairos, now war... neks da wat?

### Kip Haat

Sohnbadi sohnweh  
Skreem eena payn.  
Sohnbadi sohnweh  
Goh krayzi bad.  
Adarels plays nobadi  
Showt owt wid hapinis.  
Adarels plays nobadi  
Feel free free.  
Bot sohnhow sohnday  
Noh mata wat  
Di rayn weh bos chroo di klowl  
Wahn wash weh di payn.  
Sohnhow sohnday  
Di son weh shain dong  
Wahn gi dehn krayzi wan  
Wahn saaf ahn genkl toch.  
Kip haat, kip haat  
Di rikovri di staat.  
Tudeh day—da disya pandemik  
Tumaaro ih weel ahn ton—nyoo lik.

### Stay Strong

Someone somewhere  
Screams in pain.  
Someone somewhere  
Goes insane.  
Elsewhere no one  
Shouts with glee.  
Elsewhere no one  
Feels really free.  
But somehow someday  
Come what may  
Cloudbursts of rain  
Will wash away pain.  
Somehow someday  
Sunshine's rays  
Will caress di crazed.  
Stay strong, stay strong  
Di recovery di staat.  
Today's pandemics  
Are tomorrow's transgenics

Silvaana Udz, Ed.D. da fahn Bileez. If yu waahn tel shee bowt sohnting speshal fu put eena dis Kriol aatiki, eemayl: [sudz142@gmail.com](mailto:sudz142@gmail.com) **Vizit: [www.nationalkriolcouncil.org](http://www.nationalkriolcouncil.org)**